

XXIII

[III 24 § 1] Man mag nymande mit keiner vestunge vorwynnen yn eyne andern gerichte. Wer aber yn deme hogesten gerichte vorffestet ist, der ist in allen gerichtten voruest, die in das gerichte gehorn. Wer aber in deme nedern gerichte voruestet ist, der ist yn deme hochern nicht voruest, her en werde dar redelich yn gebracht.

[III 24 § 2] Der nedere richter mus nicht richten die vestunge, die der obirste richter gethan hot, es en sie also wissentlichen, das hers selben wolle geczug syn yn des hochsten richters stad.

Glosa

[III 24 § 1] Man mag nymande mit keiner vestunge et cetera. Nu wil her yn deszeme artikele seczczen drie stugke von der vestunge, die vil nuczcze syn.

Das erste ist, das man nymande vorwynnen mag mit der vestunge yn eyne andern gerichte, die in deszeme gerichte ober on gegangen ist. Das kumpt daruon, das eyne vestunge nymande den lip nympt, sie werde beczuget mit deme richtere vnd mit seben mannen.

Grifet her on denne yn eyne andern gerichte, vnd brenget her denne den richter dar, von deme her voruestet ist, der en mag dar nicht zugen als eyn richter. Wenne eyn richter ist nirgen richter wenne yn syme gerichte. Dauon ist das biewort, das man keinen geczug ober das feld gefuren moge. Das ist, das kein richter buszen syme gerichte zugen mag als eyn richter. Vnd der richter en mag des nicht geczug syn. Wenne her en weis des nicht wenne von sogethanen Worten, vnd von den en mag nymand zugen, extra de testibus c. tam literis nostris.

Hir ist iegen: Wer sin recht yn eyner stete vorluszet, der hot es allewege verloren. Hir ist ouch iegen die gewanheit. Wenne man mit der vestunge eynen man vorczuget allewege.

Wenne die gewanheit gut ist, so ist sie lichte zcu haldenne, Inst. de iure gen. § <ex^b> non scripto. Wor ouch das recht vnder czwiuele ist, das sal man noch der gewanheit richten, ff. de iure gen. l. si interpretationem.

Eczliche werden voruestet, das doch ire bruche nicht ist eyne grosze ergerunge in der heiligen cristenheit. Desze en mag man nicht vorwynnen yn eyne andern gerichte.

b) über dem x Abkürzung für -tra Hs.